

IV. PAZKO IGANDEA (C)

Otoitza

Jainko ahalguztidun betierekoa,
 eraman gaitzazu zeruko atseginen jabe izatera,
 fededunen artalde apala irits dadin,
 beronen artzaina den Kristo iritsi den lekuraino.
 Zurekin eta Espiritu Santuarekin.

I. IRAKURGAIA: Ap Eg 13, 14. 43-52

Atzerrietara goaz.

Apostoluen Eginetatik

Egun haietan, Paulo eta Bernabe, Perjen zehar, Pisidiako Antiokiara iritsi ziren; larunbatez sinagogan sartu ziren eta han eseri.

Judutar eta Jaungoikoa gurtzen zuten proselito askok jarraitu zien; eta Paulo eta Bernabek, haiekin hitzeginez, berotu egiten zituzten, Jaungoikoaren graziari leial jarrai ziezaioten.

Hurrengo larunbatean, ia herri osoa bildu zen Jaungoikoaren hitza entzuteko. Jendetza hura ikusita, judutarrak bekaitzez bete ziren eta irainka erantzuten zioten, Paulok esaten zuenari. Orduan, Paulo eta Bernabe kementsu mintzatu ziren:

«Beharrezkoa genuen, lehenengo zuei hotsegitea Jaungoikoaren hitza; baina, hitz hau ezetsi eta zeuek betiko bizitzarako gai ez zaretela erabakitzen duzueenez gero, atzerrietara goaz. Hau agindu baitigu Jaunak: "Atzerrien argitzat jartzen zaitut, lurraren bazterreraino nire salbamen izan zaitezten"».

Jentilak poztu egin ziren hau entzutean, eta Jaunaren hitza goresten zuten; eta betiko bizitzarako zirenek sinetsi zuten.

Jaunaren hitza zabaltzen ari zen herrialde hartan guztian. Baina judutarrek berotu zituzten haundiketako emakume jainkozale batzuk eta herriko jauntxoak; eta Paulo eta Bernaberen kontra erasoaldia sortu zuten, eta beren mugetatik bota zituzten. Hauek, beren oinetako hautsa haien aurka astinduta, Ikoniora joan ziren. Ikasleak, berriz, pozez eta Espiritu Santuaz beterik gelditu ziren.

ERANTZUN SALMOA: Sal 99, 2. 3. 5

**R/. Jaunaren herri gara
 eta Haren larreko artalde.**

Edota: **Aleluia.**

Lurtar guztiok, egin irrintzi Jaunari,
 Jaunari zerbitzu alai egiozue,
 Haren aurrera pozez oihuka sar zaitezte. R/.

Jakizue Jauna dela Jainko,
 Berak egin gaitu, Berarenak gara,

Beraren herri eta larreko artalde. R/.

«Onbera baita Jauna,
Haren maitasuna betidaino,
Haren leialtasuna mendeen mendeetaraino.» R/.

II. IRAKURGAIA: Ap 7, 9. 14b-17

*Bildotsa isango dute artzain,
eta Berak eramango ditu ur bizien iturrietara.*

Apokalipsis liburutik

Nik, Joanek, talde haundi bat ikusi nuen, inork zenbatu ezin halakoa, enda eta leinu, herri eta hizkuntza guztietakoa, aulkiaren eta Bildotsaren aurrean zutik, zuriz jantziak, eta palma adarrak eskuetan.

Eta zaharretako batek honela esan zidan: «Hauek nekaldi haunditik datozenak dira. Bildotsaren odoletan garbitu dituzte eta zuritu beren jantziak. Horregatik daude Jaungoikoaren aulki aurrean, eta gau ta egun gur egiten diote bere jauretxean; eta aulkian eseririk dagoena haien artean biziko da. "Ez dute izango gehiago, ez goserik, ez egarririk; ez ditu joko, ez eguzkiak, ez sargoriak". Aulki aurrean dagoen Bildotsa "izango baitute artzain, eta Berak eramango ditu ur bizien iturrietara. Eta Jaungoikoak txukatuko ditu haien begietako malkoak"».

EBANJELIOA: Jn 10, 27-30

Aleluia: Jn 10, 14

R/. Aleluia.

V/. Ni naiz artzain ona –dio Jaunak–;
ezagutzen ditut neure ardiak,
eta neureek ezagutzen naute Ni. R/.

Nik betiko bizia ematen diet nire ardiei.

Jesu Kristoren Ebanjelioa San Joanen liburutik

Aldi hartan, Jesusek honela esan zuen: «Nire ardiek aditzen dute nire mintzoa; Nik ezagutzen ditut, eta haiek ondotik datozkit. Eta betiko bizia ematen diet; ez dira betirako galduko, eta ez dizkit inork eskutik kenduko.

Haiek eman dizkidan Aita, beste denak baino haundiagoa da, eta inork ere ezin ditzake ken nire Aitaren eskuetatik. Aita eta biok, bat gara».

Oparigaien gainekoa

Pazko sakramentu honek, Jauna, gure erospena berritzen du;
hartazazu gure esker ona, eta iguzu,
opari hau beti poz iturri izan dakigula.
Jesu Kristo.

Prefazioa: Pazkoaldikoa.

Jaunartze ondorengoa

Artzain ona zaren Jainko Jauna,
zaindu ezazu maitasunez zeure artaldea;
eta eraman betiko larre gurietara
zeure Semearen odolaz salbatu dituzun ardiak.
Errege bizi baita.